



勅修浙江通志序

自班固易八書爲十志而郡縣徵文考獻之書亦各以志名兩浙爲東南名區若統十一郡而通爲一編則自前明方山薛應旂始今覽其記載雖一省之士地險易政事沿革在綱不紊惜乎體製之未備考訂之未詳迨康熙癸亥復徵耆碩分任修輯以數月告竣且局於薛之門類未能遽稱盡美我

世宗憲皇帝振綱肅紀百廢具興

特允廷臣之請

命將各省志書重加編纂務得完善以資采擇奉

詔之後卽啟館聚書遴聘淹貫之士考核刪訂經始於雍正

九年脫稿於十二年冬而繕本授梓則十三年秋也

爲門五十有四卷二百有八十視舊志爲加詳焉甲

寅冬臣玉麟銜

命兼轄兩浙由閩疆取道括蒼經東甌歷西越駐節武林以

次徧巡浙地見夫井疆戶口之殷庶士習民風之謹

醇以及山川城郭軍營斥堠之雄武整飭仰見我

朝之

列祖

列宗經營締造休養生息率土化成遠邁隆古兩浙則尤沐

湛恩之渥而風移俗易者也今

上續承大統勤求治理薄海內外罔不率俾是志之輯正

以上昭

朝廷之謨訓功烈下著臣民之節概文章而疆域土物之

屬亦采之詳而考之確焉庶足以潤色鴻業揚扈休

明豈獨故實有徵爲一時之觀美已也臣玉麟學慙

稽古識昧通經縱使夙夜研求無裨志乘而忝列封

圻率屬校讎罔敢僭勞例得屬言以識簡端俾天下

知一道同風之盛有如是而臣得附名以垂不朽云


乾隆元年七月

誥授光祿大夫兵部尚書福浙總督前總督福建浙江等

處地方軍務兼理糧餉兼都察院右副都御史拜他

拉布勒哈番加入級紀錄三十八次功加一等臣郝

玉麟謹撰



勅修浙江通志序

雍正十年歲在壬子^臣以菲材恭膺

世宗憲皇帝簡命節制兩浙於時方修通志莫輯未竟綏理之暇重加參稽竊見十一郡舊志其僅存於今者如咸淳之臨安嘉泰之會稽至元之嘉禾及赤城新定諸志而已自明洪永以後增修繼作下逮屬縣纂述紛紜然未有省志也省志則自嘉靖中華亭徐文貞階始武進薛方山應旂踵成之我

朝重熙累洽其軌同文四遠來賓入苑在宥方輿之式廓聲教之誕敷爲前古所未有而兩浙曾經

聖祖仁皇帝翠華南幸

恩綸疊沛六十餘年休養生息人物之彬郁都邑之雄富水泉之疏衍財賦之豐饒風俗之醇茂疆理之規畫至美且備攬筆而書之宜有以紀鴻懿而昭炳蔚矣顧自康熙乙丑前撫^臣趙士麟嘗因薛志之舊損益成書而蒼萃舊聞尙多脫略標序章憲未見詳明茲特加博采羣然具備前志分三十七門今引其緒而增益之類十有七合五十四門計二百八十卷凡官斯土者援章考索伏覽

天章可以瞻鴻編之輝耀焉載聞

獨恤可以仰膏雨之隆洽焉於海塘海防可以見阻阨之克固焉於積貯漕運可以見儲備之有道焉於錢法鹽法權稅驛傳可以見經制之咸宜焉於經籍碑碣可以攬遺文而補缺失焉於名臣忠臣武功循吏介節可以傳駿烈而溯清徽焉

聖治愈隆大文彌著則今之增於舊者固處於不得不詳之勢而非以夸多而競富也書旣成將付剞劂更延紳士校勘蓋兢兢乎慎之矣恭惟我

皇上繼承大統綏猷建極富有日新兩浙之民咸沐浴福應被潤澤於無窮盱衡盛美其將何以揚扆會^臣奉命還都旋督漕運未能躬蒞厥事越丙辰浙藩司以^臣曾董是役復寄刊本展卷洛誦迴環再四仰見我

國家之消化至治歷歷在是而千載之掌故洪纖悉備焉庶乎足以備外史之傳而呈

乙夜之覽矣^臣雖譚陋不文然莅浙四載是書之本末同異甄綜討覈未嘗少懈奚敢不臚言簡端而自外於右文之世也是爲序

乾隆元年六月既望

誥授資政大夫總督准揚等處地方漕運海防提督軍務前總督浙江等處地方軍務兼理糧餉管巡撫事兼

浙江通志 序

理兩浙鹽政兵部右侍郎兼都察院右副都御史加

一級紀錄十一次臣程元章謹撰

勅修浙江通志序

浙東西郡縣自漢以後隸揚州刺史唐隸觀察節度
宋隸安撫使元置江浙等處行中書省逮明洪武初
改爲浙江承宣布政使司領郡九後以嘉興湖州二
府來屬領郡十一

國朝因之而浙江遂爲東南屏翰之首任斯職者不綦重
歟臣自筮仕以來愿官不離浙土今奉

命旬宣夙夜祗懼愧未能勉稱厥職以仰副

聖天子任使之恩意而用以考鏡得失周知政俗則惟志

乘是資蓋志乘者經國之典章致治之龜鑑也欽惟

世宗憲皇帝德盛化神萬方在宥而宵旰勤民不遺遐邇

特命直省纂修通志進呈

睿覽煌煌乎甚鉅典也浙江於雍正九年開局編纂前督臣

相繼裁定於雍正十二年冬先繕稿本咨送

一統志館以備采擇明年秋七月遂以十二年所定之

本檢付剞劂恭逢

皇上御極之始善繼善述庶政方新德祥恩普而覃敷於

浙土者尤至深至渥自宜恭紀簡端以昭示萬古於

是宮保大學士制府臣曾筠增纂至雍正十三年而

是書克成既延紳士俾任校讐之役而臣復取其已

校者躬自點勘反覆加詳焉閱一歲而訖工總爲二
百八十卷嘗攷舊通志原本前明薛志體裁大略相
同今是書之成則綜薛志舊志而損益更定之卷首

纂錄

詔諭

聖製爲全志之綱領所謂大書提要依經以樹則附聖以

居宗者也考故實增舊志者四曰封爵曰祥異曰經

籍曰碑碣紀時政增舊志者八曰蠲恤曰漕運曰積

貯曰錢法曰海塘曰海防曰權稅曰驛傳而人物一

門則增名臣忠臣循吏武功介節而析孝友義行爲

二合儒林文苑隱逸爲十蓋變文以起例依類以定

名瞻而不穢詳而有體可謂殫歲月之纂組羅竹素

之費琛者矣抑臣循覽是編伏觀兩浙自設總藩以

來克舉其職者如孫原貞之武功白圭之蠲賦余子

俊之講水利劉璋之益軍儲韓鎬之築隄捍海畢亨

之發帑賑濟張憲之封議羨銀雍泰之嚴絕私販潘

恩之禁斥貪墨熊達之籌畫芻蕘蒙詔之丕釐法紀

王基之殫精綜核他若洩政勤敏如王純執守堅定

如徐源忠厚仁恕如杜謙節用愛人如劉大夏敦本

崇儉如李贊鋤奸雅惡如蔣昇莫不樹駿烈於當時

垂休光於來禩展卷如過益深高山仰止之思若夫
疆宇之阨塞徭賦之殷繁人物之彬雅制度之恢宏
又皆足以輔益經緯光裕憲章化而裁之推而行之
道揆法守於是乎在然則是書之作固非徒侈采摭
之富以垂空言於後世實可爲官斯土者之鑒鑑也
臣不文未能敷宣景耀神述紬繡而猶得於贊比
之餘恭識一言以爲官方之助竊與有榮幸矣

乾隆元年七月朔旦

誥授通奉大夫浙江等處承宣布政使司布政使加一級

紀錄九次臣張若震謹序

勅修浙江通志序

世宗皇帝御極之七年紀綱釐飭制度修明大有頒書祥徵

疊見聲教訖於遐荒人民安於耕鑿朝廷之上師師

濟濟閭里之間熙熙皞皞

聖人在上如日中天禮樂文章燦然明備爰

命直省各督撫纂修通志上之史館彙纂

本朝一統志以昭一道同風之盛臣衛時以總督督巡撫

事備員浙省聞

命之下哀羅典籍延禮儒神設館授養矢公矢慎一年餘始

脫稿而臣以奉

詔入覲未遑校勘旋蒙

聖恩改授直隸總督屢移書諮詢今總督大學士臣嵇曾筠

始以剗剔告竣進

呈

今上皇帝是書實經始於臣例得附名簡末而藩司亦以

副本郵寄徵序於臣惟周禮夏官司險掌建九州

之圖周知山林川澤之阻達其道路地官誦訓掌方

志以詔觀事以知地俗春官保章以星土辨九州之

地秋官職方掌天下之圖地與其財用周知利害辨

九州之國使同其貫司徒掌邦之土地之圖與其人

民之教以佐王授邦國周知九州之域廣輪之數辨

其山林川澤邱陵墳衍原隰之名物及土會之數此

志之所自肇也雖然三代以上志之權在上列國各

自爲書獻之天子家宰掌六典實總司其事三代而

下朝不以授攬爲功官不以掌故爲亟於是乎風俗

有紀方輿有考太平寰宇輿地廣紀之作雖間亦奉

詔纂述然皆出學士大夫之手自爲一家言逞其才

華創爲體製典麗華瞻則有之至於徵文考獻體國

經野之義或缺焉迨元之中葉始有一統志之舉而

書不傳至明宣德間乃克有成書我

朝因之然遠稽前代各府州縣雖間有志乘而或出之守

令或成自是邦之耆碩挂漏殘缺不全不備欲如我

朝由縣而申之府由府而申之司彙一省之志乘貫串融

會刪煩就簡著爲成書呈之史館蓋亦未之前聞也

夫權操於下則名宦人物方言耆舊皆足以資才人

之膾炙藝苑之采擷魯論所爲識其小也識其小亦

道也權操於上則典章制度因革損益必有關於國

計民生之重然後由鉅以及細由重以及輕因其地

因其時繁簡詳略不失其宜魯論所爲識其大也識

其大而不遺其小此今日作志之體要也民爲邦本

食爲民天浙江戶口殷繁本處所出米穀每不足供通省一歲之食我

朝

列祖

列宗念切民依豫爲籌畫設立常平倉以備儲積臣洎任之後詳稽冊籍大縣多至二三萬石小縣亦不下萬石而且寬租賜復截漕停徵免累年之積欠豁嘉湖之浮糧又念省會人民聚居且爲諸郡適中之地設立永濟鹽義等倉約貯米穀五六十萬石所爲先事豫防者至矣漢唐以來所未之有也浙爲財賦之區地丁襍項不下三百萬金漕米約百八十萬石歲積月累畸零積欠勢所不免雍正六年清查天下錢糧有多至千萬及數百萬者浙民未完不過六十萬臣適承乏茲土歲際屢豐加以勸導不數年所剩無幾此亦足以見浙民奉上之誠矣而且漕運則冬兌冬開未十月已悉抵水次鹽政則私梟遁迹官引廣行銷所如諸鹽義烏浦江等縣松所如華婁奉金等縣片引不銷之地今悉通商設店此皆

聖朝積累深仁淪肌浹膚感民之切入民之深故能至此載之志乘亦足以徵一時之盛矣東南爲人文淵藪

歷稽史冊理學有人勲業有人忠孝節義與夫雕龍繡虎之才指不勝屈我

朝稽古右文振興鼓勵於浙士思尤至渥江南以兩省之大而中額相符直隸以

蒙輔之重而每科館選約略相似雍正八年鼎甲三人咸屬浙產此自制科以來不多見者上之待士如是其降下之報上敢不爭自奮與崇實學而謝浮華勵實行而祛澆薄由是而學校興由是而風俗厚當拭目俟之至於兵制海防海塘水利尤爲浙省重大之務浙東西十一郡濱海者六

國家設提鎮置重兵星羅碁布制度嚴密臣自洎浙以後月有校歲有閱又遵奉

諭旨首嚴米穀出口之禁而公家協濟運送八閩千艘銜尾不數日自閩復回如行門戶港汊之間我

朝

聖聖相承德威遠播蒼茫萬里波瀾不生然法制禁令固有不可一日弛者浙東七郡除溫台一帶間有入海水道其餘溪澗之水並入錢江浙西三郡悉由太湖出海海口固宜暢流而支河小港之水務使深濬則水不易涸農家得備車戽行旅便於往來其爲利民豈

淺鮮哉臣 在浙省荷蒙

世宗憲皇帝修城開河貯有經費隨飭地方官吏不時相度宜疏而疏宜濬而濬今聞數年以來略無水旱之虞然日久則淤勢所必至未淤而疏費省功倍亦大較也若夫海塘之關係地方雖屬浙省而利害兼及江南坍漲疑有天意而隄防實藉人力雍正十一年偶有潰決

特命內大臣臣 海望臣 馳驛南下相度機宜還

朝覆奏我

世宗憲皇帝屢念千里之廣人民城郭田畝廬舍之重不惜數百萬帑金

命改建一百餘里大石塘我

皇上甫登大寶卽

命閣臣 經理其事此杭嘉湖蘇松常鎮七郡奠安之慶千秋萬世之計豈僅目前之幸浙民永久之利也哉邦之人知其大者而用意焉務農桑敦孝弟其民之秀者務爲明體達用之學以羽翼經傳黼黻

皇猷士大夫之蒞是邦者知其大而留意焉因所當因革所當革致力於未事之先不爲後事之圖以無負

列祖

列宗暨我

皇上殷殷垂訓之盛心則煌煌

詔諭恭紀首冊一展卷而無非典謨訓誥之垂唐虞三代之良法美意也其餘山川疆域星野物產等類纂志者例得備書例所當書亦安得而不書所謂識其大以及其餘也謹拜手稽首而爲之序

乾隆元年歲次丙辰七月穀旦

誥授光祿大夫太子少保兵部尚書兼都察院右副都御史直隸總督前浙江總督管巡撫事兼理鹽政節制江南加十二級紀錄十七次又軍功紀錄一次臣 李衛恭撰

勅修浙江通志序

周官職方會稽爲揚州山鎮漢興因之以立郡其疆
索所及則今浙東西之地是也晉晉而分吳興臨海
東陽至隋而分遂安餘杭永嘉至唐而分餘姚信安
縉雲至宋而分嘉禾雖建置代殊繡壤交錯抑十一
郡之所從來漸矣自元置行中書省於浙江而省之
名自此始明仍其制改爲承宣布政使司而省之名
不易也蓋嘗攬全浙之形勢北通吳會南連閩粵人
物盛麗都邑雄富昔人按之圖牒徵諸文獻采摭風
謠載筆而書者踵起相接顧其書不具存其見於今
日者自咸淳臨安嘉泰會稽寶慶四明至元嘉禾及
新定赤城諸志而外他無聞焉迨夫省志之作防於
明成化間而浙江之有志則成於嘉靖中提學副使
方山薛君應旂今所傳薛志是己志初屬稿於少傅
存齋徐君階而應旂重加詮次始辛亥迄辛酉閱十
載凡七易稿而後成然其間繁簡失倫純駁互見議
者病之

國朝車書一統幅員之廣軼於前代康熙二十一年前總
督臣趙士麟巡撫臣王國安嘗因薛志之舊輯而新
之願以數月竣事其簡略猶是也我

皇上御極以來聲教誕敷至治翔洽海隅日出之鄉固不
率俾而尤以兩浙爲東南重地

綸綍煥夫諱文誥宜夫經制嚴江海之防疏水泉之利
豫庥虞之饒定輓輸之則制鹽策之權與衡泉布之
輕重通商寓懷來之仁置郵視化行之速皇皇典制
亦既疏舉而廣謀實行而審畫所以加恩於浙民者
如是其至周且渥矣而循覽舊志多闕焉不載將何
以章軌道而示來茲乎雍正七年

詔天下各修省志以備

一統志之采擇時總督臣李衛慎選名俊開局編纂徵
前侍讀學士臣沈翼機原編修臣傅王露檢討臣陸
奎勳等總其成按討舊聞網羅散軼恪遵

內廷纂修之例徵引原文臚列書目以備考索而於舊
志之外增門一十有七首紀

詔諭

聖製以爲全志之綱領若蠲恤若積貯若海防若海塘若
漕運若驛傳若榷稅若鹽法若錢法皆

聖政之大者至載封爵而不列帝王明志之異於史也記
祥異而不附星野明天人感應之理不限於封域也
稽經籍而并及碑碣見文獻之足徵析人物爲十門

見道德文章事功學術之各有表見而儒林李義文苑之非有外於人物也書成凡二百八十卷可謂醇且備矣越明年督臣衛移節畿輔今督臣元章蒞浙會纂輯甫竣而臣執攝乏承宣專任校勘之役自惟謏陋無所開益仍延臣露於官舍相與晨夕讐比反覆論定閱一載始卒業卽奉有巡撫安徽之命去浙後猶惓惓於心輒復寓書商榷往來靡間今者屬將鉉板恭呈

乙覽因念是書經兩督臣裁鑒之審二詞臣輯綴之勤而臣執不文亦復研摩編創歷有一歲之久爰不揣固陋謹詮敘始末臚言簡端以附名不朽云

雍正十三年三月

誥授通奉大夫江南安徽等處巡撫今陞刑部左侍郎前浙江布政使司布政使臣王紉謹撰序

勅修浙江通志序

欽惟我

皇上繼承丕緒六字同文敷政動民德洋恩普

軫念浙江海塘重關東南民命

特命臣曾筠往董其役經畫綜理因閱視江海形勢親歷

浙東西周咨審度竊見夫山川之清淑都邑之盛麗

物土之殷饒人文之彬郁負山枕海控吳楚而引閩

粵偉哉誠東南之都會而財賦之上腴也旋叨

恩命授臣以節制撫綏之任甫受事適前督臣奉

勅纂修通志成書將謀剏刷爰於治事之餘遞加檢閱重

爲審定剏期授梓聞半載而工竣爲門五十有四爲

卷二百有八十蓋兩浙風教之所被掌故之所存胥

於是乎在矣按浙省記載自左氏吳語越語而後有

越絕吳越春秋之作遂爲志乘嚆矢至漢分吳會丹

陽爲三郡有三郡記吳朱育作會稽土地記韋昭著

吳興錄而晉孔叢賀循並有會稽記王韶之有吳興

郡疏鄭緝之有東陽記有永嘉郡記梁吳均有入東

記若唐陸羽之志吳興宋周宗之志臨安羅濬之志

四明施宿之志會稽陳書卿之志赤城衛玠之志信

安董弅之志新定皆是也沿及元明十一郡先後各

有府志要皆自爲一郡之記載而未有著萃之者嘉

靖辛酉吾鄉先達方山薛應旂爲兩浙提學副使合

十一郡所屬輯成通志七十二卷是爲浙江通志之

始

國朝康熙癸亥歲奉文修輯蓋以薛志爲藍本而斟酌損

益之稱稱備焉距今五十年其間典禮之修明制度

之因革政理之條貫民物之登耗文章功業之彪炳

而建樹月異日新拱織備具使佚而不紀何以彰前

軌示來轍乎是編之作開局於雍正辛亥春記事於

乙卯冬歷數歲之久兼綜眾長考証得失參互同異

旁搜博采可謂勤矣今按其體裁分門別類增舊志

者什之三考古訂今增舊志者什之七而傳述舊聞

格遵

內廷編纂之例悉徵引原文標列書目以備考索至記

載時事謹依

大清會典采錄科條章奏務存實據以便稽查杜預所謂

發凡言例皆經國之常制史書之舊章此則前志所

未有也臣建旆茲土夙夜冰兢冀康庶事而答

主知而竊懼識有未逮慮有未周恭閱是編誦

聖訓庶知所遵循覽方城庶知所經理察禮祥庶知所做

省采譚俗庶知所化導觀制置而閱廢興庶知所修
舉攬形勝而扼阻要庶知所備禦按兵賦而審虛實
庶知所綜覈視土物而驗虧盈庶知所阜安景仰前
轍庶知所矜式授討遺文庶知所考鏡蓋治道之綱
維民生之利病一寓目而盡得之他日或能策庸勵
鈍勉竭惓誠鞏海疆而奠澤國以上佐

聖天子維新之化則於是書實重有賴也爰裝就疏進謹
拜手稽首而颺言於簡端

乾隆元年歲在丙辰七月朔吉

誥授光祿大夫太子太保文華殿大學士兼吏部尚書總

理浙江海塘兼管總督巡撫兩浙鹽政印務加十四

級臣嵇曾筠謹撰序

勅修浙江通志後序

周禮小史掌邦國之志外史掌四方之志志之統於史也尙已鄭元訓志爲記而以春秋傳實之蓋記猶述也謂傳述舊聞而不必有所作也王通稱聖人述史而孔子已自言竊比老彭則柱下之所掌與邦國四方之所志一本於述其義明矣而後之作志者以爲志與史異不妨自爲論撰以成一家言究亦未嘗不掇拾前人之緒餘而不言所自出人亦不復辨其所從來遂盡掩古人之作以爲己有甚而割裂文義顛倒字句或不免以文書詞以詞害意承譌襲舛輟轉相仍而反藉口於前人之失不亦惑歟至於記載時政則多矜括其事變易其文而語焉不詳意指流失使後之人無從考其顛末何以傳信於天下臣爲末學固陋愚無知識竊嘗備員史局忝荷

恩命在

武英殿修書處行走欽遵編纂

御書體例凡經史子集悉采輯原文標列書目或詞義冗長僅從刪節毋許更易一字煌煌定制蓋深有契於聖人述而不作之義也雍正七年

詔直省纂修通志進呈

御覽前浙江總督

臣

李衛博徵載籍慎選名俊於辛亥之

春開局編纂而屬

臣

董其成臣惟志之與史體裁

雖或不同其爲記事之書則一也記莫大於典章記

莫重於經制記莫要於文獻典章者經緯天地綱紀

人倫而垂憲於萬世者也故恭述

聖訓冠於卷首以爲全志之綱領經制者經國之常制因

革損益隨時制宜謹依

會典開載備述科條章奏以爲各門之條目若夫文獻

者用以標敘盛德昭紀鴻懿所謂藏之名山傳之其

人者也先述史書繼述志乘旁及名人之撰錄下逮

里巷之謳吟退授博討按古證今而要不外乎述者

近是而或者謂此類書之體非志書之體夫志書之

與類書亦何所區別乎班固十志原於史遷之八書

而歷代史氏因之若律歷禮樂刑法食貨之屬皆類

也而均謂之志唐杜佑倣劉秩政典益以大歷以還

時政廣爲通典一百卷而劉煦志經籍列之類家宋

鄭樵輯天文地理職官選舉等類撰二十略而統名

之曰通志則類書之稱志有由來矣不甯惟是陳壽

作三國志司馬彪作續漢志司馬光思歷代史繁不

能備覽遂爲通志八卷以獻英宗命置史局續成通

鑑皆史也而以志名隋大業初勅內史舍人竇威崔
祖濟等撰區宇志二百卷又勅秘書學士十八人修
十郡志以內史侍郎虞世基總檢輯成一千二百卷
卷首有圖圖上題字竝用歐陽肅書今之通志殆做
此是志也而皆衷諸史然則志之與史有以異乎無
以異也是編記載雖未能有當於史氏之采擇而恪
守

內廷編撰之例一本於述此則臣露所爲奉管兢兢而

無敢隕越者也未脫稿會督臣衛移節畿輔署撫臣

王國棟臣嗣督臣程元章相繼裁定同時操鉛槧者皆

先後散去惟屬臣以始終其事自辛亥迄乙卯閱數

歲之久晨夕讎比就正商榷罔敢作輟甫卒業而大

學士臣曾筠兼秉節鉞重加審定始克鈐木蓋其慎

也竊因剞劂之成而謹著固陋之識如此

乾隆元年歲次丙辰七月既望

賜進士及第文林郎原任翰林院編修充

武英殿纂修官臣傅王露謹拜手稽首恭撰